



2025 წლის I კვარტლის ეკონომიკური ზრდის ტემპის პროგნოზი


საქართველოს პარლამენტის
საბიუჯეტო ოფისი

2025
თებერვალი

პარლამენტის საბიუჯეტო ოფისის შეფასებით, 2025 წლის I კვარტალში რეალური მშპ-ის ზრდის ტემპი დადებითი იქნება და 4.8% დაფიქსირდება.

პარლამენტის საბიუჯეტო ოფისის შეფასებით, 2025 წლის I კვარტალში რეალური მშპ-ის ზრდის ტემპი დადებითი იქნება და 4.8% დაფიქსირდება. მშპ-ის მოსალოდნელი ზრდა 2025 წლის პირველ კვარტალში განპირობებულია კოვიდ პანდემიის შემდგომ დაწყებული გაუმჯობესებული ეკონომიკური მდგომარეობის შენარჩუნებით. მიუხედავად იმისა, რომ 2025 წლის პირველ კვარტალში ეკონომიკის ზრდის საბაზისო ეფექტი მაღალი იყო (2024 წლის პირველ კვარტალში ეკონომიკა გაიზარდა 8.7%-ით), ეკონომიკური მდგომარეობის გაუმჯობესება კვლავ გრძელდება. უნდა აღინიშნოს, რომ ეკონომიკის ზრდის მაღალი ტემპი შენარჩუნდა 2024 წლის IV კვარტალში. კერძოდ, სტატისტიკის ეროვნული სამსახურის წინასწარი მონაცემებით, 2024 წლის IV კვარტალში საშუალო რეალური ზრდა 8.4%-ით განისაზღვრა, რაც აღემატება პარლამენტის საბიუჯეტო ოფისის მეოთხე კვარტლის პროგნოზს (7.1%)¹. საბიუჯეტო ოფისის 2025 წლის პირველი კვარტლის ეკონომიკური ზრდის პროგნოზი ემყარება დაშვებებს, რომ 2024 წლის პირველ კვარტალთან შედარებით:

- ტურიზმის მოცულობა² დაახლოებით 1.05-ჯერ გაიზრდება (2019 წლის პირველი კვარტლის პანდემიამდელ მაჩვენებელთან შედარებით დაახლოებით 1.1-ჯერ ნაკლები). ამავე დროს გაიზრდება ქვეყნიდან გასული ვიზიტორების რიცხოვნობაც;
- ტურიზმის ექსპორტის მნიშვნელოვან ზრდასთან ერთად კვლავ შენარჩუნდება შიდა ტურიზმის აქტივობა;
- გაიზრდება როგორც კერძო მოხმარების, აგრეთვე ინვესტიციების მოცულობა, რაც განაპირობებს მთლიანი მოხმარების და ინვესტიციების ზრდას, შესაბამისად, ეკონომიკური აქტივობის აღნიშნულ დადებით ტემპს;
- მთავრობის საინვესტიციო აქტივობების ზრდასთან ერთად, გაზრდილი მოხმარების და კერძო ინვესტიციების პარალელურად მოსალოდნელია, რომ გაიზრდება როგორც საქონლის იმპორტის, ასევე საქონლის ექსპორტის მოცულობა.




*პროგნოზის ინტერვალი აღნიშნავს დიაპაზონს, რომელშიც მშპ-ის ზრდის ტემპი იქნება მოცემული. ინტერვალის შეფასება მიღებულია ცენტრალური პროგნოზისა და გასული წლების კვარტალური ეკონომიკური ზრდებიდან ± 0.5 სტანდარტული გადახრის ჯამით.


1. www.pbo.parliament.ge

2. საერთაშორისო მოგზაურების ვიზიტების რაოდენობა შეფასებულია, ამავე მაჩვენებლის, წინა პერიოდების ზრდის ტენდენციის გათვალისწინებით

აღნიშნული დაშვებების რაოდენობრივი შეფასების შედეგად მოსალოდნელია, რომ 2025 წლის პირველ კვარტალში იმპორტის მოცულობა უფრო მეტად გაიზრდება და წმინდა ექსპორტის კომპონენტი -1.0%-ული პუნქტით განსაზღვრავს ეკონომიკური აქტივობის ცვლილებას, ხოლო აბსორბციის (მოხმარების და ინვესტიციების ჯამი) კომპონენტი მნიშვნელოვნად გაიზრდება და მშპ-ის ცვლილებას 5.8%-ული პუნქტით განაპირობებს*. საბიუჯეტო ოფისის გაანგარიშების მიხედვით, 2024 წლის მეოთხე კვარტლის ეკონომიკური ზრდის შეფასებაში წმინდა ექსპორტი -1.4%-ული პუნქტით, ხოლო აბსორბციის კომპონენტი 9.8%-ული პუნქტით განისაზღვრა.




*2025 წლის I კვარტლის მშპ-ის ზრდის დეკომპოზიცია. საბიუჯეტო ოფისის შეფასება.



აღსანიშნავია, რომ 2020 წელს დაფიქსირებული მკვეთრი ეკონომიკური კლების გამო, ქვეყნის ეკონომიკა პოტენციურ დონეს ჩამორჩებოდა და, შესაბამისად, რეალური მთლიანი შიდა პროდუქტის უარყოფითი გაბი დაფიქსირდა. თუმცა, 2021 წლის მეორე კვარტალში დაფიქსირებულმა მაღალმა ეკონომიკურმა აქტივობამ ეკონომიკური ზრდის პოტენციურ დონეს გადააჭარბა და, შესაბამისად, მშპ-ს დადებითი გაბი დაფიქსირდა. აღნიშნული ტრენდი შენარჩუნებული იქნა მომდევნო წლებში და 2024 წლის IV კვარტალშიც. საბიუჯეტო ოფისის პროგნოზით, ეკონომიკური ზრდის მაღალი ტემპი შენარჩუნდება 2025 წლის I კვარტალში და, შესაბამისად, ეკონომიკური ზრდა მის პოტენციურ დონეს გადააჭარბებს, ანუ მშპ-ს გაბი დადებითი იქნება.

2024 წლის IV კვარტალში წლიური ინფლაციის საშუალო მაჩვენებელმა 1.1% შეადგინა, ანუ მიზნობრივი ინფლაციის 3.0%-იან მაჩვენებელზე ნაკლები.

აღსანიშნავია, რომ 2022 წელს დაფიქსირებული საშუალო წლიური ინფლაციის მკვეთრი ზრდის (11.9%) შემდეგ, 2023 წლიდან აღნიშნული მაჩვენებლის კლება ფიქსირდება. სამომხმარებლო ფასების ინფლაცია მნიშვნელოვნად შემცირდა 2023 წლის მეორე კვარტლიდან (1.6%), რაც, ძირითადად, მსოფლიო ბაზარზე ნავთობსა და სურსათზე ფასების კლებით იქნა გამოწვეული. აღნიშნული შემცირების ტენდენცია გრძელდება, რის საპასუხოდაც საქართველოს ეროვნული ბანკი ეტაპობრივად ახდენს მონეტარული პოლიტიკის განაკვეთის შემცირებას. მონეტარული პოლიტიკის კომიტეტის გადაწყვეტილებით, 2024 წლის 31 იანვარს, მონეტარული პოლიტიკის განაკვეთი 0.5 პპ-ით შემცირდა, 13 მარტს - 0.75 პპ-ით, ხოლო 22 მაისს - 0.25 პპ-ით და 8.0% შეადგინა, რამაც საბიუჯეტო ოფისის შეფასებით, ხელი უნდა შეუწყოს ეკონომიკური აქტივობის ზრდას. აღნიშნული ფაქტორი გავლენას იქონიებს ინფლაციის მაჩვენებელზე, კერძოდ ზრდის მიმართულებით.



დამატებითი ინფორმაცია:

[წლიური მაკროეკონომიკური პროგნოზები](#)

[განმარტება მაკროეკონომიკური პროგნოზების მოდელის შესახებ](#)



2025
თებერვალი